



Clypevs Theologiæ Thomisticæ

Continens Tractatus de Beatitudine, de Actibus humanis, eorumque Moralitate; de Virtutibus ac Donis, de Vitiis ac Peccatis, & de Legibus, nec-non Dissertationem Theologicam de Probabilitate

Gonet, Jean-Baptiste

Parisiis, 1669

§. II. Alia difficultas expeditur

[urn:nbn:de:hbz:466:1-77355](#)

ca ratione, sed ex extrinseca providentia & manutententia Dei, quos articulo praecedenti impugnavimus. Secunda id contendit de peccato habituali, & negat de actuali. Ita Durandus, Victoria, Medina, Suarez, Salas, & alij. Tertia negat peccatum tam actualē quam habituale posse cum visione & amore beatifico simul existere. Hanc ut probabiliorem sustinent Martinez, Ildephonse, Ioannes à S. Thoma, Marcus à Serra, & alij ex nostris Thomistis.

S. I.

Prima difficultas resolvitur.

Dico primō, non posse, etiam de absoluta Dei potentia, cum visione aut amore beatifico peccatum actualē componi.

80. Hac conclusio sequitur ex fundamentis articulo praecedenti statutis: Nam iuxta D. Thomam sic se habet respectu videntis Deum bonitas divina, sicut respectu non videntis Deum ratio boni in communi: At impossibile est per quamcumque potentiam, quod homo in via aliquid velit, nisi sub ratione boni in communi; cūm malum ut tale non possit appeti, ut infra parebit: Ergo repugnat quod in patria videns Deum velit aliquid, nisi in ordine ad bonum divinum; atque adeò quod velit peccatum. Item impossibile est quod aliquis peccet sine iudicio practico, quo judicetur hic & nunc esse appetendum aliquid, quod ad Deum non sit ordinabile: Sed implicat tale iudicium cum beatifica visione conjungi: nam illa est perfectum iudicium, quo beatus speculativē & practicē judicat Deum esse super omnia amandum, & omnia ad ipsum esse ordinanda: Ergo peccatum actualē non potest, etiam de absoluta potentia, cum beatifica visione componi.

81. Confirmatur: Ideò odium Dei cum beatifica visione conjungi nequit, quia stante visione non potest voluntati proponi Deus sub ratione malī; cūm per illam proponatur & representetur ut summum bonum: At etiam repugnat quod stante visione voluntati ut bonum proponatur aliquid objectum, avertens aut divertens à Deo; cūm beatus evidenter judicet per illum nihil esse bonum nisi in ordine ad Deum: Ergo repugnat cum visione beatifica quodvis peccatum actualē, non minus quam odium Dei conjungi.

82. Confirmatur amplius: Prudentia infusa non potest simul esse cum peccato, ut docet S. Thomas 2. 2. qu. 47. art. 13. Ergo nec visio clara Dei; qua speculativē & practicē perfectior est prudentiā infusa, imò eminenter continet omne id quod habet actus prudentiæ.

83. Deinde suadetur conclusio specialiter de amore beatifico: Iste enim est formalis conversio actualis ad Deum, cum virtuali ad minus dispergientia omnis divergentis ab ipso: Atqui cum conversione actuali stare non potest de potentia etiam absoluta aversio actualis à Deo, quae in peccato mortali invenitur; nec etiam cum virtuali dispergientia cuiuscumque objecti divergentis à Deo, actualis diversio competens veniali peccato: Ergo nec peccatum mortale, nec est veniale est compatibile cum amore beatifico, etiam de potentia Dei absoluta.

84. Denique probati potest conclusio ratione generali. Non potest Deus de potentia ordinaria actualē peccatum cum visione & amore beatifico conjungere: Ergo neque de extraordinaria

& absoluta. Antecedens conceditur ab Adversariis, & patet ex dictis articulo praecedenti. Consequentia sic probatur: Ea quae Deus miraculosè, ac de potentia extraordinaria & absoluta operatur, illi ut speciali authori aut conservatori attribuuntur: Sed repugnat conjunctionem actualis peccati cum visione & amore beatifico, Deo ut authori aut conservatori speciali attribui: Ergo & illa de absoluta potentia simul conjungi. Major patet, Minor probatur. Producens aut conservans speciali concursum unionem ac similitatem duorum extremonrum, attingit utriusque existentiam: Sed repugnat Deum, ut authorem aut conservatorem speciali, attingere existentiam peccati, tam in fieri, quam in conservari; alias illi, vel ut producenti, vel ut conservanti, attribueretur peccatum: Ergo repugnat conjunctionem actualis peccati cum visione & amore beatifico, Deo ut authori aut conservatori speciali adscribi.

S. II.

Alia difficultas expeditur.

Dico secundō: Peccatum etiam habituale de absoluta potentia non posse cum beatifica visione componi.

85. Probatur primō: Impossibile est per quamcumque potentiam, quod homo simul habeat duos ultimos fines simpliciter, etiam si unum habeat actualiter, & aliud solum habitualiter, ut suprā ostensum est: Sed videns Deum, habet Dispt. 1. illum actualiter pro ultimo fine simpliciter; cūm visio beatifica sit Dei ut ultimi finis adeptio: qui verò est in statu peccati, in creaturam ut ultimum finem habitualiter conversus est: Ergo repugnat peccatum habituale cum beatifica visione conjungi.

86. Probatur secundō: Quae Deus miraculosè & de potentia extraordinaria & absoluta operatur, illi ut speciali authori vel conservatori tribuuntur; si enim de absoluta potentia impeditur v.g. calor ignis expelleret frigus ab aqua, conservatio frigoris illi ut speciali authori tribueretur: Sed repugnat conjunctionem peccati habitualis cum beatifica visione attribui Deo ut speciali authori; alioquin, ut suprā arguebamus, existentia aut conservatio peccati illi ut authori speciali tribueretur, quod infinita ejus sanctitati repugnat: Ergo implicat peccatum habituale, de potentia Dei extraordinaria & absoluta, cum beatifica visione componi.

87. Probatur tertio, ratione fundamentali, quae virtualiter est triplex: Peccatum enim habituale, seu macula peccati, tria importat, scilicet privationem gratiae, aversionem à Deo ut ultimo fine, & quod talis privatio & aversio sit voluntaria, seu ex praecedenti actu voluntatis causata: E. Sed visio beatifica hac tria virtualiter saltem excludit: Ergo cum peccato habituali incompatibilis est. Major supponitur ex tractatu de peccatis; Minor verò quantum ad singulas partes breviter suaderi potest. Et primō, quod visio privationem gratiae virtualiter excludat, sic ostenditur. Actus necessariò supponens in subiecto à quo elicetur gratiam sanctificantem, ejus privationem implicitè saltem & virtualiter excludit: Sed visio beatifica gratiam sanctificantem in subiecto à quo elicetur, necessariò & indisponibiliter supponit: Ergo ejus privationem virtualiter saltem excludit. Major patet: gratia

DE PROPRIETATIBVS BEATITVDINIS.

71

enim sanctificans sui privationem formaliter ex- A pellit; sicut lux formaliter expellit tenebras, & quilibet forma sui privationem: Ergo actus necessariò & indispensabiliter supponens in subiecto à quo elicitur gratiam habitualis, virtualiter saltem, ejus privationem excludit, & cum ea incompossibilis est. Minor verò, in qua est difficultas, sic probatur. Actus perfectè vitalis vitalitate supernaturali, necessariò supponit in subiecto à quo elicitur principium radicale vita supernaturalis: Sed visio beatifica est actus perfectè vitalis vitalitate supernaturali; unde in Scriptura *vita aeterna* sapè appellatur; & gratia sanctificans est principium radicale vita supernaturalis, cum illa teneat locum substantiae supernaturalis, & sit prima radix virtutum & donorum supernaturalium, que sunt principia proxima actuum supernaturalium, quibus homo in actu secundo vivit vita supernaturali: Ergo visio beatifica necessariò & indispensabiliter supponit in subiecto à quo elicitur, gratiam sanctificantem. Minor est certa, quoad utramque partem. Major verò declaratur & probatur exemplo actuum vitalium ordinis naturalis: Intellectio enim v.g. necessariò & indispensabiliter supponit in subiecto à quo elicitur, principium radicale vita supernaturalis, scilicet animam rationalem; & idem dic de volitione, visione, comestione, & aliis operationibus vitalibus ordinis naturalis: unde cum de vita supernaturali eodem modo, proportione servata, philosophandum sit, ac de vita naturali (gratia enim non destruit naturam, sed perficit) dicendum est, actus perfectè vitalis vitalitate supernaturali, necessariò & indispensabiliter supponere in subiecto à quo eliciuntur principium radicale vita supernaturalis, quod aliud esse non potest quam ipsa gratia sanctificans. Ex quo inferes Deum non posse, etiam de absoluta potentia, elevare hominem existentem in peccato mortali ad visionem beatificam, nisi priùs, saltem naturam, gratiam sanctificantem illi infundat; alioquin simul viveret & non viveret vita perfectè supernaturali: sicut non potest facere quod corpus mortuum operations vita naturalis exercet, nisi priùs naturam animam illi infundat.

88. Secunda pars Minoris principalis, quæ asserit visionem beatificam, aversionem à Deo ut ultimo fine virtualiter saltem excludere, & cum ea non posse componi, facile suadetur. Visio enim beatifica est adeptio ultimi finis, seu perfectissima cum Deo ut ultimo fine conjunctio, ut patet ex dictis disputatione præcedenti: Sed consecutio ultimi finis, seu perfecta cum Deo ut ultimo fine conjunctio, separationem & aversionem à Deo ut ultimo fine excludit, & cum ea incompossibili est, etiam de absoluta Dei potentia: Ergo & visio beatifica.

Neque dici potest, solum intellectum beati uniri Deo tanquam ultimo fini per visionem beatificam non autem voluntatem; atque ita voluntatem posse ab illo manere habitualiter aversam. Nam contra est, quod intellectus non solum facit finem presentem sibi, sed etiam toti supposito, & consequenter voluntati, saltem mediatis: unde sicut repugnat lapidem immobiliter conjungi centro, & simul ab eo recedere & elongari; ita implicat beatum immobiliter conjungi Deo ut ultimo fini per visionem beatificam, & simul ab eo manere habitualiter aversum & separatum per peccatum habituale in voluntate existens.

Tertia pars Minoris principalis, quæ dicit visionem beatificam, rationem voluntarij, in peccato habituali inclusam, virtualiter saltem destruere, sic ostenditur. Non potest visio clara Dei non destruere virtualiter illud quod amor beatificus destruit formaliter: Sed amor beatificus destruit formaliter rationem voluntarij ad peccatum habituale pertinentem: Ergo visio Dei eandem destruet virtualiter. Minor est certa: quia voluntaria prosecutio summi boni, destruit necessariò voluntariam prosequitionem cuiuscumque objecti peccaminosi, sibi directè oppositam. Major verò probatur: Forma virtualiter continens aliam, virtualiter praefat effectum ejus formaliter: Sed visio clara Dei est forma virtualiter continens amorem beatificum, cuius est radix, & unus ex effectibus formalibus amoris beatifici est destruere rationem voluntarij, ad peccatum habituale pertinentem: Ergo visio beatifica hoc ipsum virtualiter praestabit.

89.

§. III.

Solvuntur objectiones.

OBJICES primò contra primam conclusionem: Non minus repugnat beatitudini tristitia seu dolor actualis, quam actualle peccatum; sicut enim beatitudo excludit malum culpa, ita & malum pœna: Sed de potentia absoluta, tristitia seu dolor actualis cum beatitudine essentiali, seu visione beatifica, comprensibilis est; ut patet in Christo, in quo fuit summa tristitia, & dolor, licet ab instanti sua conceptionis esset beatus & comprehensor: Ergo etiam actualle peccatum, cum beatitudine seu clara Dei visio ne potest subsistere.

90.

Respondeo negando Majorem: tum quia peccatum repugnat beatitudini, ratione visionis beatificæ, quæ cum sit ejus essentia, seu ratio formalis constitutiva, ab ea inseparabilis est: dolor verò seu tristitia illi repugnat ratione gaudij, seu delectationis beatifica, quæ cum non sit essentia beatitudinis, sed tantum ejus proprietatis, de potentia absoluta ab ea separari potest. Tum etiam, quia tristitia seu dolor non importat aversionem ab ultimo fine, nec procedit ex iudicio & dictamine erroneo, sicut peccatum, sed tantum importat defectum aliquem naturæ, sive innatum, sive illatum, & aliquid ipsi inconveniens; non est autem implicantia seu repugnantia, quod visio beata sit simul cum aliquo defectu aut re aliqua inconvenienti ipsi naturæ; quia naturam in omnibus esse reparatam & perfectam, non est ipsa essentia beatitudinis, sed effectus ejus, pertinetque ad statum ejus accidentalem, non verò ad substantiam: bene tamen implicat aversionem ab ultimo fine, & iudicium seu dictamen erroneum, cum beatifica visione subsistere, ut satis supra ponderatum est.

91.

Objicies secundò: Potentia ad peccandum est de essentia libertatis creatæ, vel saltem ejus pars aut complementum: Sed in beatis remanet perfecta libertas: Ergo & potentia ad peccandum.

92.

Respondeo negando Majorem: potentia enim ad peccandum, neque est de essentia libertatis creatæ, neque ejus perfectio, aut complementum, sed potius aliquis defectus illi convenientis per accidens, & prout est in subiecto.